

NGA MEMA PAREMATA.

Kaore he korero a Te Toa Takitini mo nga Mema kua whakaingoatia nei mo te Paremata. Ko te pepa na te iwi katoa o Aotearoa o Te Waipounamu. No reira kua koutou hei pouri mo a koutou reta mo o tatou mema kaore nei i perehitia. Kua hoki mai a Taranaki Te Ua i tana haere i roto i nga marae o te rohe pooti o Te Tai-rarawhiti. Kanui tona mihi ki te pai o te manaaki a nga tangata i a ia. Kua tae mai a Apirana Ngata ki te whai-haere i muri i nga tapuwae o Taranaki. Kanui hoki tona mihi ki te manaaki a nga tangata i a ia. Kaore ano he whakaatu mai mo nga mema e whakaara ana i a ratou mo te Tai-Tokerau, ko Tau Henare anake. Ko te pakanga nui o Te Tai-hauauru kei waenganui i a Ta Maui Pomare me te Tamaiti a Ratana. Ko Uru ano te mema mo te Waipounamu e rangona nuitia ana. Ko tetahi o nga uri o te Iwi Maori kei te rangona nuitia tona ingoa i enei ra pakanga mo te pooti ko Henare Peneti. Kei te pakanga ia ki a Wiriwhata te upoko o te Apiti-hana, te mema mo Hutt i Poneke. Kei te tu a Henare mo te taha Kawanatanga. I kurangia a Henare ki Te Aute Kareti, a he taina hoki ia ki a Peneti, Minita. No runga i a Te Arawa tenei tamaiti.



Whare Karakia o te Pakipaki. — He whakaatu tenei kua timata tonu atu inaianei te hanga o te Whare karakia kohatu o te Pakipaki. Ko te tumanako o nga kai-whakahaere kia oti taua whare i roto i nga ra o Maehe, a kia whakapuaretia e te Pihopa i roto i nga ra o te Wiki o Te Aranga ara i te Wiki tuatahi o Aperira. Ko te tinana o te Whare ma Tangiora e whakaara mo te £750. Ko te aroha a Te Pihopa ki a Tangiora mo tana whare e £50. Ko te utu mo te tawa e £200. Kua waiho ma te iwi te tawa e whakaaro. Kia kaha nga morehu ki te whakaara i ta koutou tawa kia wana ai te tu mai o to koutou whare hei whakahonore i te Atua hei whakamihia ma nga uri i roto i nga rau tau i muri i a tatou. Kua rite te £200 i te Komiti wahine o te Hooro o Te Pakipaki i te hui i te 26 o Noema.